

# ጳውሎስ ዲሞትሳው ፃፊዱ ላዔንሶ ኪታ ጌሉዋ

ሃዋ ጳውሎስ ዲሞትሳው ፃፊዱ ላዔንሶ ኪታይ፡ ጳውሎስ ማታ ባሬና ማዲያን ኦሎም ባሬናና ኢቲፔ ኦሊያ ዋዳላ፡ ዲሞትሳ ዘሬዳ ዘሬያ ኦይቄዳዎ። ኣ ዘሬያፔ ዳሪያ ባጋይ ዳንዳያን ጌንጫና ቤሴ ጊያዎ። ዲሞትሳው ዘሬያን ሚንጮሉዋ ቃላይ ኢሜቴዳዎ፡ ዩሱስ ኪሪስቶስ ለማንቲያዎ ጊዲዳ ማርካታናዳን፡ ሚሺራቸዎ ቃላን ኤጫ ቃላ ጫቁዎ ቲሚርቲያ ሚኒሲዳ ኦይቃናዳን ማንቲያባይን ኤቄቲያባይ ዳርፔካ ታማሪሲያዎን ሚሺራቸዎ ቃላ ኦዲያዎን ሚናናሳ።

ዲሞትሳ ኤያቴላን ኦሴቲያ ፓጮና ማላ ፓሉማፔ ሃካና ማላ፡ ዲማ ሚኖ ኦዲ ኣው ኦይቴዳ፡ ኣዩሲ ጎፔ፡ ህዋ ማላ ኦዲ ሲሲያዎንታ ባዩዚያዎፔ ኣቲን፡ ሃራ ኢ ኢሚያ ጎዒ ባዎ።

ህዋን ኡባን ዲሞትሳ ሃሳያናው ቤሲያባይ ጳውሎስ ዳዑዎን ኣ ሃኖታ ሎዖ ቆፋ፡ ህዋፔካ ኣ ኣማኑዎ፡ ኣ ጌንጩዎ፡ ኣ ሲቁዎ ኣ ዳንዳያን ዩዳሳን ኣ ጋኬዳ ሜቱዎ ለሚሱዎን ካላናዳና።

## ሺምፓቱዋ ኡባቱዋሲ ኢሜቴዳ ቃንሳ ቆፋቱዋ

ጌሉዋ (1:1-2)

ዲሞትሳው ኢሜቴዳ ማቁዎ (1:3-2:13)

ኣሳይ ካዲያ ዎዳ ኣማንቲ ቤቱሳ (2:14-4:5)

ህ ዎዳ ዳዒያባቱዎን ኮሺያ ካሌሊያ ኦጋቱዋ (4:6-18)

ዉርሴሳ ቁቲያ (4:19-22)

1 ታኒ ጳውሎስ፡ ያሳይ ኣማና ጌዳ ኪሪስቶስ ዩሱሳና ኦሲ ዳዒያ ዳዑዋባ ኦዳናው፡ ያሳይ ጌዳዎዳን፡ ኪሪስቶስ ዩሱስ ኪቲዳዎ፡ 2 ታ ሲቆ ናዓ ዲሞትሳው ሃ ዳቢዳቢያ ፃፋይ።

### ዲሞትሳው ኢሜቴዳ ዘሬያ

ያሳ ኣዉዋፔን ኦ ጎዳ ኪሪስቶስ ዩሱሳፔ፡ ኣጵ ኬካቴላይ፡ ማርቴላይን ሳርቴላይ ኔው ጊደ።

3 ታ ዛራቱ ኦጲዳዎዳን፡ ታኒካ ታና ዘሬያ ጌሻ ዎዳናፔ ኦሊያ ያሳ ቃማን ጋላሲ ዎሲያ ዎሳን ኡባ ዎዳ ኔና ሃሳዩያ ዲራው፡ ኣ

ጋላታይ። 4 ታኒ ኔ አፎላ ሃሳያ ሃሳያዴ ናሽታና ማላ፣ ኔና ቤዓናው ዳሮ ላሞታይ።

5 ኔናን ዴዒያ ዋርዶ ባይና አማኑዋ ሃሳያይ። ሄ አማኑ ቤኒ ኔ ዳይ ዳይ ሎይዲኒኔ ኔ ዳይ ኤወኒቂን ዴዒያ አማኑዋ ማላ፤ ቃሲ ኔናኒካ ሄዌ ዴዒያዋ ኤራዲ። 6 ሄዋ ዲራው፣ ታኒ ታ ኩሺያ ላዑዋ ኔ ቦላ ዋሌዳ ዋዴ፣ \* ያሳይ ኔው ኢሜዳ ኢሙዋ ኔኒ ደሺሴና ማላ፣ ኔና ሃሳዩሳይ። 7 አዪሲ ጎፔ፣ ያሳይ ኑሲ ዋልቃ፣ ሲቁዋኔ ኑ ሁጲያ ናጊያዋ ኢሚያ ጌሻ አያና ኢሜዳፔ አቲን፣ ያሻ አያና ኢሚቤና።

8 ሲሚ፣ ኑ ጎዳው ማርካቲያዋን ዋይ አ ዲራው ቃሹዋን ዴዒያ ታዋንካ ዩላቶፓ። ሺን ያሳይ ኔው ኢሚያ ዋልቃ ከናን ታናና ሚሺራቹዋ ቃላው ዋዬታ። 9 ያሳይ ባሬ ቆፋኒኔ ባሬ አቅ ኬካቴላን ኑና አሺዴ፣ ባሬ አሳ ኦላናው ዪሶዋፔ አቲን፣ ኑኒ ኦሌዳ ኦሶዋ ዲራው ጊዴና። ኢ ሃ አቅ ኬካቴላ ኪሪሰቶሲ ዩሶሳ ባጋና ዋዲ ደሜታናፔ ካሴ ኑሲ ኢሜዳ። 10 ሺን ሃዒ ሃ አቅ ኬካቴላይ ኑና አሺያ ኪሪሰቶሲ ዩሶሳ ዩሳን ኑሲ ቆንጩዳ። ቃሲ ሃይቁዋ ዋልቃካ ኢ ቆዩሴዳ። ዋንጋላ ሚሺራቹዋ ባጋና ባዩና ዴዑዋ ኑሲ ቆንጩሴዳ።

11 ታኒ ዩሱሲ ኪቲዳዋኔ አዪሁዳ ጊዴና አሳ ታማሪሲያዋ ጊዳዴ፣ ዋንጋላ ሚሺራቹዋ ኦዳና ማላ፣ ያሳይ ታና ደሬዳ። 12 ቃሲ ታኒ ሃ ሜቱዋ አኪያዌ ሄዋ ዲራሳ። ሺን ታኒ አማኔዳዋ ኤሪያ ዲራው፣ ዩላቲኬ። ቃሲ ኢ ታው ኢሜዳ ሃዳራ ሄ ጋላሳይ ጋካናው፣ ኢ ናጋናው ዳንዳዪያዋ ኤራይ።

13 ታኒ ኔና ታማሪሴዳ ቱሙ ቃላ ሎሚሱዋ ኑዳ ኦዩቃዴ፣ ኪሪሰቶሲ ዩሶሳን ኑሲ ዴዒያ አማኑዋኒኔ ሲቁዋን ዴዳ። 14 ኑ ጊደን ዴዒያ ጌሻ አያና ባጋና ኔው ሃዳራ ኢሜዳ ሎዎባ ናጋ።

15 ኢሲያ ጊያ ቢታን ዴዒያ ኡባቱ ታፔ ባቃቲዳዋ ኤራሳ፤ አንቱንቱ ጊደን ፒጌሉሲኔ ሄርሞጌኔሲ ዴዒና።

16 ሄኔሲፎሩ ታና ዳሮ ዋዴ ሚንሌሌዳ ዲራው፣ ጎዳይ አ ሶይ አሳው ማርቲላ አሞ። ቃሲ ታኒ ቃሾ ጎሌን ዴዒያዋ ኢ ዩላቲቤና።

17 ሺን ሮሜ ጊያ ካታማ ጋኬዳሳና ታና ሎይላ ኮዪዴ ዴሜዳ።

18 ሄ ጋላሲ ጎዳፔ ማርቲላ ዴማናዳን፣ ጎዳይ አው አሞ። ቃሲ

\* 1:6 ታኒ ታ ኩሺያ ላዑዋ ኔ ቦላ ዋሌዳ ዋዴ፣ ሃዌ ቤሲያዌ፣ አማኒያ አሳ ካሌላናዳን ጌሻ አያናዩ ኦሶዋሲ ደሪና ቱማቲላን ካሌሊያዋንቱ ቃላ ኦዳናው ዋይ ታማሪሳናው ያሳይ ኦኬዳዋንቱ ቦላን ባሬንቱ ኩሺያ ዋሌዴ ዋሲያዋ ቤሴ። 1፻፵ 1:4 ጻሊቱ።

ኤፌሶና ጊያ ካታማን ኢ ታና ኣይ ኬና ማዴዴንቶኔ ኔኒ ሎይላ ኤራሳ።

## 2

ኪሪሰቶሳው ሎዖ ዎታዳራ ጊዲዴ ሜቱዋ ኣኪያዎ

1 ሰሚ ታ ናዓው፡ ኪሪሰቶሲ ዩሱሳን ዴዒያ ኣጵ ኬካቲላን ሚና። 2 ቃሲ ዳሮ ማርካቱ ዴዒያሳን ታፔ ኔኒ ሲሴዳ ዩዋቱዋ ሃራቱዋ ታማሪሳናው ዳንዳዪያ ኣማኔቲዳ ኣሳቱዋሲ ሃዳራ ኢማ።

3 ኪሪሰቶሳ ዩሱሳው ኣማኔቲዳ ዎታዳራዳን፣ ታናና ዋዩታ። 4 ኦላ ቢያ ዎታዳራይ ባሬ ካፑዋ ናሼቻናው፣ ዎታዳራ ጊዴና ኣሳይ ኦሊያ ኪታን ዋላኬቴና። 5 ቃሲ ዋላን ኬሴቲያ ኡራይካ ዎጋዳን ዎፃና ጳዮፔ፣ ዎይታ ኣኬና። 6 ዳሮ ዳቡሪዴ ኦሌዳ ቢታ ጎሺያ ቢታኒ ሺቄዳ ካላፔ ባሬና ጋኪያዋ ኮይሮ ኣካናው ቤሴ። 7 ኔኒ ኡባባ ኣኬካናዳን፣ ጎዳይ ኔና ዳንዳዪሳና ዲራው፣ ታኒ ጊያዋ ቆፓ።

8 ታኒ ዎንጋላ ሚሺራቹዋ ኦዲያዎዳን፣ ሃይቁዋፔ ዴንዴዳ ዳዊቱ ዛሪያ ዩሱሲ ኪሪሰቶሳ ቆፓ። 9 ታኒ ዎንጋላ ሚሺራቹዋ ኦዲያ ዲራው፣ ኢታባ ኦሌዳዎዳን፣ ሃራይ ኣቶ ቃሼታና ጋካናው ዋዩታይ። ሺን ያሳ ቃላይ ቃሼቴና። 10 ሄዋ ዲራው፣ ታኒ ያሳይ ደሬዳ ኣሳቱካ ኪሪሰቶሲ ዩሱሳን ዴዒያ ኣቶቲላ ሜዲና ቦንቹዋና ዴማናዳን፣ ኡንቱንቱ ዲራው፣ ታኒ ኡባባን ዋዩታይ።

11 ሃዌ፡  
«ኑኒ ኣናና ኢቲፔ ሃይቄዳዋ ጊደፔ፣  
ኣናና ኢቲፔ ዴዓና።

12 ኑኒ ጌንጮፔ፣  
ኣናና ኢቲፔ ካዉታና።

ኑኒ ኣ ካደፔ፣  
ኢካ ኑና ካዳና።

13 ኑኒ ኣማኔቲናን ኣጎፔካ፣  
ኢ ኣማኔቲያዋ ጊዲዴ ዴዓናዋ።  
ኣዪሲ ጎፔ፣ ኢ ባሬና ባሬ ሁጹው  
ኤሪኬ ጋናው ዳንዳዬና»

ጊያዌ ቱሙ ሃሳያ።

ሚና ኦሳንቻ

14 ኔኒ ኔ ኣሳ ሃዋ ሃሳዪሳ፤ ኡንቱንቱ ቃላን ፓሎሜቴና ማላ፣ ያሳ ሲንላን ዞራ። ሄዌ ሲሲያ ኣሳ ባዪዚያዋፔ ኣቲን፣ ኣይኔ ጎዔና። 15 ኔኒ ያሳ ቱማቲላ ቃላ ሱሬቲላን ኦዲያዎኔ ቃሲ ኣ

ኦሶ ዩላቴና ኦሳንቻ ገዳዳ፣ ያሳይ ሳቢያ አሳዳን፣ ኔ ሁጲያ ያሳው አማናው ሚና። 16 ሺን ሃ ሳዓው ኢንጃቲያ ማዳና ሃሳያ፤ ኔና ናጋ። አዩሲ ጎፔ፣ ሄዌ ያሳፔ አሳ ሃሴ። 17 ቃሲ ኡንቱንቱ ታማሪሲያዌ ቦላ ጨቱዋዳን ኡባሳ ጋካናሳ። ሄ ታማሪሲያዋንቱ፤ ላዓቱ ሄማኔዮሳኔ ፒሊያሳ። 18 ኡንቱንቱ ቱሙዋ ኦጊያ አጊዴ፣ «ሃይቁዌ፤ ዳንዲያዌ ካሴ አጁዲጌዳ» ያጊዴ አማሬዳ አማኒያ አሳቱዋ አማኑዋ ባዩዚኖ።

19 ገደፔካ፣ ያሳይ ኤሴዳ ሚኖ ቱሳይ ቃፃና ዳንዳዬና። ቃሲ አ ቦላን፣ «ጎዳይ ባሬዋንታ ኤሬ»፤ ቃሲ «ጎዳዋ ገዲያ ኦኒኔ ኢታ ኦሱዋ አጎ» ያጊያ ቃላቱ ፃፊቴዲኖ።

20 ኢቲ ዋልቃማ ጎሌን ዋርቃፔኔ ቢራፔ ማጴቴዳ ሚሻ ፃላላ ገዳናን፣ ሚላፔኔ ኡርቃፔ ማጴቴዳ ሚሻቱካ ዳዲኖ። ሄዋንቱፔ ባጋቱ ቦንቾ ኦሱዋ ኡንቱንቱን ኦላናው፣ ቃሲ ባጋቱ ቶሼቲያባ ኡንቱንቱን ኦላናው ማጴቴዲኖ። 21 ሄዋ ዲራው፣ ኦኒኔ ሃ ኢታባ ኡባፔ ባሬና ጌሾፔ፣ ኢ ባሬ ጎዳ ጎዲያ ኦሱዋ ኦላናው ባሬና አማዳ ዲራው፣ ቦንቾ ኦሱዋ ኦሊያ ሚሻ ገዳናዋ። ቃሲ ሎዎ ኦሱዋ ኡባ ኦላናው ገጌቱዳዋ ገዳናዋ።

22 ሺን ኔኒ ኢታ ዋዳላቴላ አሙዋፔ ባቃታ። ባሬንታ ማዳናው ጌሻ ዋዛናፔ ጎዳ ፃሲሲያዋንቱና ኢቲፔ፣ ዲሎቴላ፣ አማኑዋ፣ ሲቆቴላኔ ሳሮቴላ ሚኒሳዳ ካላ።

23 ሺን ኤያቱዋ ፓሉሚኔ አይኔ ኤሬናዋንቱ ፓሉሚ ዋላሳ ካሌሊያዋ ኤራዳ አፔ ባቃታ። 24 ጎዳ ቆማይ ኡባው ኬኪያዋ፣ ሎይሲ ታማሪሲያዋኔ ዳንዳያንቻ ገዳናው ቤሴፔ አቲን፣ ዋላቁታናው ቤሴና። 25 ቃሲ ኢ ባሬና ኢጲያዋንታ አሺኬቴላን ሲሪያዋ ገዳናው ቤሴ። ኡንቱንቱ ባሬንቱ ናጋራፔ ሲሚዳ፣ ቱማቴላ ኤራናዳን ያሳይ ኦላኔንቶ፣ ኦኒ ኤራ። 26 ቃሲ ኡንቱንቱ ባሬንቱ ዋዛና ቆፋው ሲሚዳ፣ ኡንቱንታ ባሬ ኮዬዳባው አዛዜታና ማላ ኦይቄዳ ፃላሂያ ካቸዋ ዳባፔ ኬሲ አካና።

### 3

#### ወርሴላ ጋላሳቱዋን ሃናናው ዳዲያ ኢታ ዩዋቱዋ

1 ሺን ወርሴላ ጋላሲ ዋዩሲያ ዋዲ ያናዋ አኬካ። 2 አዩሲ ጎፔ፣ አሳይ ባሬና ሲቂያዋንታ፣ ሻሉዋ ሲቂያዋንታ፣ ጨቁቴያዋንታ፣ አዩያዋንታ፣ ቦሪያዋንታ፣ ባሬና ዩሌዳዋንቶ አዛዜቴናዋንታ፣ ጋላቴናዋንታ፣ ጌሻቴላይ ባይናዋንታ፣ 3 ሲቁ ባይናዋንታ።

---

2:19 ፓይ 16:5

ሲጌቱናዋንታ፡ ዘገርሳንቻቱዋ፡ ባሬና ናጌናዋንታ፡ ከኬናዋንታ፡ ሎዖባ ደሴናዋንታ፡ 4 ኡባ ኤሪኬ ጊያዋንታ፡ ዲርቢያዋንታ፡ ኦቶሩዋን ሱጌቲያዋንታ፡ ቃሲ ያሳፔ አሊዴ፡ ኢሻሉዋ ደሲያዋንታ ጊዳና። 5 ኡንቱንቱ ያሳው ጎዱኒያዋ ማላቲኖ፤ ሺን ኣ ዋልቃ ካዴዲኖ። ሄዋንቱ ማላ ኣሳቱዋኮ ሺቆፓ።

6-7 ኣዪሲ ጎፔ፡ ኡንቱንቱፔ ኢቱ ኢቱ ኣሳ ጎሊያ ጌሊዴ፡ ናጋራይ ዳዳዳዋንታ፡ ዲማ ዲማ ኣሙዋን ሱጌቲያዋንታ፡ ኡባ ዋይ ታማሪዴ፡ ቱማቲላ ኤሪ ኣካናው ሙሌ ዳንዳዪቤና ዳቡራንቻ ማጫዋንታ ባሌሊኖ። 8 ያንሲኔ ያምባሬሲ \* ሙሴ ዬወዋ ጳልቆዋዳን፡ ሄዋዳን ቃሲ ሃዋንቱ፡ ሱሬ ቆፋይ ባይናዋንታ ኣማኑዋን ኩንዴዳዋንቱ፡ ቱማቲላባ ጳልቂኖ። 9 ሺን ያንሳ ኤያቲላይኔ ያምባሬሳ ኤያቲላይ ቃሲ ቆንጩዳዋዳን፡ ኡንቱንቱ ኤያቲላይካ ኣሳ ኡባው ቆንጩና ዲራው፡ ኡንቱንቱ ካሴዋፔ ኣጲዴ ዲጩኪኖ።

**ወርሴላ ዘሪያ**

10 ሺን ኔኒ ታ ቲሚርቲያ፡ ታ ሃኖታኔ ታ ቆፋ፡ ታ ኣማኑዋኔ ታ ዳንዲያ፡ ታ ሰቂዋኔ ታ ጌንጩዋ፡ 11 ታ ዬዳሳኔ ታ ዋዪያ ቤዳዳ። ኣንዮኪያኔ፡ ኢቆኒዮኔኔ ሊሰዲራ ጊያ ካታማቱዋን ታና ጋኬዳባኔ ታኒ ዳንዳዬዳ ዬዳሳ ኤራሳ። ጎዳይ ታና ሄ ኡባፔ ኣሺዳ። 12 ቱማቲላን ኪሪሰቶሲ ዬሱሳን ያሳ ማላቲዴ ዳዳናው ደሲያ ኡባይ ዬዳርሴታና። 13 ሺን ኢታ ኣሳቱኔ ባሌሊያዋንቱ ሃራቱዋ ባሌሊዴኔ ባሬንቱ ሁጳው ባሊዴ፡ ካሴፔ ኢቲ ኢቲ ቢኖ።

14 ሺን ኔኒ ሄ ቱማቲላ ኦፔ ታማሪዴንቶኔ ኤራዴ፡ ኔኒ ታማሪዳዋኒኔ ኤራዳዋን ሚናዴ ዳዳ። 15 ኔኒ ጉላ ናዓቲላፔ ደማዴ ኪሪሰቶሲ ዬሱሳ ኣማናዴ፡ ኣቶቲላይ ቤቲያ ኣጲዳ ኤራ ኢማናው ዳንዳዪያ ጌሻ ማፃፋቱዋ ኤራዳ። 16-17 ያሳ ማፃፋ ኡባን ያሳ ኣያናይ ዳዴ። ቃሲ ሄ ማፃፋቱ ያሳው ኡሊያ ኣሳይ ኩሜንላኔ ሎዖ ኦሱዋ ኡባው ጊጌዳዋ ጊዳና ማላ፡ ቱማቲላ ታማሪሳናው፡ ባላ ሴራናው፡ ባዪዙዋ ሱሪሳናውኔ ዲሎቲላ ዴዖ ዘሪያ ኢማናው ማዲኖ።

---

\* 3:8 ያንሲኔ ያምባሬሲ፡ ሃ ሱንላቱ ኤጫ ጫቁዋ ማፃፋን ባዋ፡ ሺን ጮራ ኣሳይ ጊያ ቆፋይ፡ «ሃዋንቱ ሙሴ ኢሰራዴሊያ ኣሳ ጌብጻፔ ኬሲዴ ካሌላናው ቆፔዳ ዋዴ፡ ኣናና ኤቁቲዳ ሙሩኒያዋንታ» ያጊያዋና። ኬሰ 7:11፤ 12 ያሊቲ። 3:8 ኬሰ 7:11

# 4

1 ታኒ ኔና ያሳ ሲንገላኒኔ፥ ዳዑዋን ዳዒያ ኣሳኔ ሃይቄዳ ኣሳ ፒርዳናው ዳዒያ ኪሪሰቶሲ ዩሱሳ ሲንገላን፥ ቃሲ ኣ ዩሳኒኔ ኣ ካወቲላን ኔና ዘራይ። 2 ቃላ ኦዳ። ዋዲ ኢንጃቲና ኢንጃታና ጳዩና፥ ሚናዴ ኦዳ። ዳሮ ዳንዲያን ኣሳ ታማሪሳዴ ሱሪሳ፥ ሴራኔ ዘራ። 3 ኣዩሲ ጎፔ፥ ኣሳይ ቱሙ ቲሚርቲያ ሲሴናን ኢዲያ ዋዲ ያናዎ። ሺን ኣሳይ ባሬንቱ ኣሙዋ ካሊዳ፥ ሲሳናው ናሹቲያዎ ኦዲያ ታማሪሲያዎንታ ጉጂ ጉጂ ሺሻና። 4 ኡንቱንቱ ቱሙ ዩወዎ ሲሲያዎ ኣጊዳ፥ ቶሳ ሲሳናው ባሬንቱ ሃይላ ዋራ ዛራና። 5 ሺን ኔኒ ኡባባኒ ኔ ሁጲያ ናጋናው ቤሴ። ዋዩያ ዳንዲያ። ዋንጋላ ሚሺራቹዎ ኦዲያዎ ኦሊያ ኦሱዋ ኦላ። ያሳ ቆማዳን፥ ኔ ኦሊያ ኦሱዋ ኡባ ፖላ።

6 ታና ጊደፔ፥ ታ ሱላይ ጉኪዳ ያርሹቲያ ዋዲኔ ቃሲ ሃ ዳዑዋ ኣጋዴ ቢያ ዋዲ ጋኬዳ። 7 ታኒ ሎዎ ባዲያ ባዲያዲ፤ ዋላ ዋዳዴ ወርሳዲ፤ ኣማኑዋካ ናጋዲ። 8 ሲንገላቲ ታው ዲሎቴላ ኣኪሊሊ ጊሊ ኡቲዳ። ሄዎ ዲሎ ፒርዳ ፒርዲያ ጎዳይ ሄ ጋላሲ ታው ኢማና። ቃሲ ኪሪሰቶሲ ቆንጫናዎ ደሲያ ኡባሳፔ ኣቲን፥ ታ ዓላላሳ ጊዳና።

## ኣ ቡዙ ኣላላቱዋባ

9 ታኮ ኤሌካ ያናው ሚና። 10 ኣዩሲ ጎፔ፥ ዳማሲ ሃ ኣላሚያ ደሲዴ፥ ታና ኣጊዴ፥ ቲሴሎንቄያ ጊያ ካታማ ቤዳ። ቄርቄሲ ጋላቲያ ጊያ ጋዲያ ቢና፥ ቃሲ ቲቶ ዲልማዲያ ጊያ ጋዲያ ቤዳ። 11 ሉቃሳ ያላላይ ታናና ዳዒ። ማርቆሲ ታና ከታን ሎይላ ማዳናው ዳንዲያዲ ራው፥ ኣ ዳማዴ ኔናና ኣካዴ ያ። 12 ሺን ታኒ ቲኪቆሳ ኤፌሶና ጊያ ካታማ ከታዲ። 13 ኔኒ ያዴ፥ ዓርዓዳ ጊያ ካታማን ካርፖሳዋን ታኒ ዩጋዴ ዩዳ ታ ጋቢያኔ ቃሲ ማፃፋቱዎ ታው ኣካዴ ያ። ሺን ዲማያዴ ጋልባን ዓፌቴዳ ማፃፋቱዎ ኣያ ጊደፔኔ፥ ኣኬናን ዮፓ።

14 ቢራታ ቆዲያ ኢሰኪንዲሪ ታና ዳሮ ቆሄዳ፤ ጎዳይ ኣው ኣ ኦሱዋዳን ዛራና። 15 ኢ ኦኒ ኦዲያዎ ሎይላ ጳልቄያ ዲራው፥ ኔኒ ኣፔ ኔና ናጋ።

16 ኮይሮ ታና ሞቲያ ዎዴ፥ ኡባይካ ኣኔዳዋፔ ኣቲን፥ ታና ኦኒኔ ማዲቤና። ያሳይ ሄዎ ኡንቱንቶ ፓይደ። 17 ሺን ታኒ ኩሜንገላ ከታ ኣዩሁዳ ጊዳና ኣሳይ ኡባይ ሲሳናው ኦዳና ማላ፥ ጎዳይ ታ ማታን ኤቄዴ፥ ታው ዋልቃ ኢሜዳ። ቃሲ ጋሙዋ ደናፔካ ታና ኣሹዳ። 18 ጎዳይ ታና ኢታባ ኡባፔ ኣሹዳ፥ ባሬ ሳሉዋ ካወቲላ ሳርቲላን ኣፋና፤ ኣው ሜጲ ሜጲናው ቦንቹ ጊደ። ኣሜንዒ።

**ወርሴላ ሳርታ**

- 19 ጸረሰቁሊሲ፣ አቁላሲኔ ሄኔሲፎሩ ሶይ አሳው ታ ሳርታ ኦዳ።
- 20 ኤራሰቦሲ ቆሮንቶሳ ጊያ ካታማን አቴዳ። ሺን ዲሮፊሞሲ ሳኬቴዳ ዲራው፣ ሚሊፄ ጊያ ካታማን አ ዋላዲ። 21 ባልጉ ዋቆናፔ ካሴ ያናው ሚና።
- ኤወቡሉሲ፣ ጳዴሲ፣ ለኖሲኔ ቁላወዳ ቃሲ ሃራ ኢሻቱ ኡባይካ ኔና ሳሮ ሳሮ ጊኖ።
- 22 ጎዳይ ኔ አያናና ጊዶ። አጶ ኬካቴላይ ሂንቴናና ኡባና ጊዶ። አሜንዲ።

## **Ooratha Caaquwaa New Testament in Dawro (ET:dwr:Dawro)**

copyright © 2011 Wycliffe Bible Translators, Inc.

Language: Dawro

Translation by: Wycliffe Bible Translators, Inc.

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Dawro

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



2014-04-22

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
585b63ca-b8e6-55c8-bfef-10bdc95ad69c